

漢南山屬焉師古曰屬聯也音之欲反其河有兩原一出葱嶺山一

出于闐師古曰闐字與寘同音徒賢反又徒見反于闐在南山下其河北流

與葱嶺河合東注蒲昌海蒲昌海一名鹽澤者也去玉

門陽關三百餘里廣袤三百里師古曰袤長也音茂其水亭居冬

夏不增減皆以為潛行地下南出於積石為中國河云

自玉門陽關出西域有兩道從鄯善傍南山北波河西

行至莎車為南道師古曰波河循河也鄯音上扇反傍音步浪反波音彼義反此下皆同也

南道西踰葱嶺則出大月氏安息師古曰氏音支自車師前王

庭隨北山波河西行至疏勒為北道北道西踰葱嶺則

出大宛康居奄蔡焉耆西域諸國大率土著師古曰言著土地而